

## Chiniraja

Chiniraja ki to pe panse?  
Barlizour timid pe ouver so lizie  
Pou fer laroze glase briye  
Ar freser mat gramatin  
Lor fey kann ki finn kasiet  
So kouler dan marenoir.  
Lavi pe leve, somey pe kase.  
Chiniraja ki to pe panse?

Lapay sek anba to lipie pe kriye,  
To pa tande.  
Lapousier roz bes latet, zet lekor al kraze  
Lor feyaz, to pa trouve.  
Fangourin later, pe aroz ler  
Ar parfin sikre, to pa santi.  
Lor enn mel divan toi  
De perdri trakase pe pare  
Pou anvole, to pa kone.  
Lavi pe leve, somey pe kase,  
Chiniraja ki to pe panse?

To bann frer kouma toi pe bese, pe leve  
Kouma pantin  
Pa tande, pa trouve, pa santi, pa kone,  
Zot tou parey.  
Loto la arete, kolon la diboute

Bonzour misie.  
To lame pe leve, pe bese, pe leve  
Kouma masinn.  
Soley out demi-tied pe lite ar enn niaz.  
Ayo bondie!  
Dive kann antere partou kot li gagne.  
Sa mo destin!  
Sirdar la lor enn ros diboute pe donn lord.  
Sa do destin!  
Manejer lor balkon so lame dan so pos,  
Li satisfé.  
Lavi pe leve, somey pe kase.  
Chiniraja ki to pe panse?

Divan finn balye niaz,  
Soley out gonfle so  
Lestoma, avoy so  
Lalimier lor ledo  
Tabisman.  
To bann frer lev latet  
Get lesiel fer sourir.  
Bann fler kann divan toi  
Pe danse ar kouler  
Lalimier.  
Bann fey sek pe sante  
Ar kadans to mouvman.  
Enn jalsa pe monte  
Ar siro linite  
Dinite.

Zot tou pe tourn ver toi;  
Lamizik akorde;  
Enn sel not pe manke  
Pou ki toi ek leres  
Vinn enn sel.

Lavi pe leve, somey pe kase.  
Chiniraja ki to pe panse?